

Serge Mansur

E tabata e cara serio di ATIA pa algun aña y a purba trece cambio via e organisacion ey. Serge Mansur (41) a dicidi cu si berdad e kier logra cambio pa su isla e lo tin cu lansa su mes como politico. E ta mira cu tin espacio pa solucion of por lo menos mehoracion riba nos isla. Nos a bishit'e pa conoce mas di e motibonan tras di su decision.

SI BO KIER TRECE CAMBIO BO MESTER BULA 'DEN E ARENA POLITICO

Cu benta di e fabricanan di cigar aki na Aruba y Curaçao, na e gigante di cigaría Philip Morris a yega na fin di un era pa familia Mansur y comienzo di un otro. Mundo a cambia y e familia awendia ta consisti di comerciante pero tambe docter, psicologo, abogado, ehecutivo etc. pues parti integral di nos comunidad, pero tambe den exterior. Participacion den politica di e miembronan di e familia Mansur tabata minimo te cu awor. Serge Mansur a dicidi di lansa su mes como politico y kier logra cambio. Den ATIA mi a kere cu mi por a logra mucho mas via e ca-

nal ey. Nos a purba aserca, vocífera, recalca y purba dialoga basa riba nos ideanan como organisacion, pero no tabatin receptividad of mucho interes na nivel di gobierno. Mi a dicidi cu si mi kier trece cambio mi tin cu dreña e arena politico mes. E recepcion tabata hopi bon, pero mi ta realiza cu ta día di eleccion bo ta haya sa si e pueblo votador a compronde bo mensahe y bo ideanan. Serge kier bin cu un campaña diferente, menos emocion, menos bandera y parada, mas contenido. E tin na bista creacion di su website interactivo pa keda den comunicacion cu pueblo.

Cu 22 aña ela caba di studia y a bay traha cu Philip-Morris na Santo Domingo. Despues el a bolbe Aruba y asina a bin ta funciona como comerciante pa hopi aña. E familia a evalua un oferta cu a haya di Philip-Morris, cu a bin ta cumpra varios fabrica den region. Considerando tur aspecto, a dicidi di bende e fabrica. Serge Mansur a bira mas activo den e area di 'real estate' cu su ta su trabou diario. Mi ta maneja un empresa cu tin edificio na varios lugar na Aruba, por ehempel den caya grandi, y tambe na Curaçao. Asina nos ta activo den e compra-benta y huur di diferente propiedad.

Nos a puntra Serge si e fam Mansur lo ta un plus of min p'e. Mi ta masha orgo-yoso di mi familia, y locual entre otro mi abuelo y mi defunto tata a logra tanto na Aruba como den exterior den e siglo y pico desde cu mi biseabuelo a yega Aruba. Hopi miembro di mi familia a logra contribui na desaroyo di e pais aki. Manera tur cos den bida un number ta bin cu su bon y e menos bon. Tin algun asunto cu a bay menos bon den pasado manera cierto desaroyo pa cu Interbank y La Cabana, pero esey ta un minoria. Y al final, no ta mi fam ta candidato, pero ta mi persona ta esun cu ta riba lista. Serge ta sinti cu e tin hopi pa contribui na nos pais. E ta bisa pa e cantidad di belasting cu nos ta paga nos mester haya mucho mas calidad di servicio di gobierno. Motibo pa falta di esaki, e ta pensa, ta cu politicianan no kier ta honesto cu pueblo. Ehempel, nos sa cu tin hende di mas den gobierno of hende cu no ta haci nan trabou. Algun dia pasa Prome Minister a reclama cu nan ta lesa corant, yega laat y ta bay cas trempa y ta busca yiu cu auto di gobierno, pero si e como Prome Minister no por pone un paro na esaki ta ken por. Esey ta e diferencia den liderazgo. Dicon direpente e reclamo? Pasobra negosacion di indexering ta na caminda, sino lo bo no tende nada. Serge ta agrega cu e ta sigur cu esnan na mando tambe stima nos pais, pero ora e momento pa haci lo corecto yega, ey nan ta faya sea pa falta di curashi of pa falta di capacidad.

Si su partido dreña gobierno tin hopi asunto pa cambia, e ta bisa. Sin haci un estudio mi por bisabo cu tin varios area ta bisto mester di atencion. Nos caya grandi y esun di San Nicolas, bo mester como gobierno bin cu incentivo embes di bin cu djis exigencia. Papi cu hende, duna esnan cu tin edificio den caya un tiki libertad pa nan por haci nan mehoracion. E ta pensa cu introduccion di algo chikito lo haci cambio grandi, ehempel parkeerster. Den comercio, Serge ta bisa, cada aña na December bo ta haya un sorpresa nobo di gobierno. Gobierno ta planea y prepara durante aña cambionan grandi den secrecia, anto den temporada di Pasco atabo ta haya tende cu gobierno a bolbe cambia e reglanan di wega, sin bisa niun hende nada; regla cu

ta cumbini nan so. Mi ta puntra ta con bo ta planea bo aña como dunador di trabou, si e cosnan aki ta sigui sosode. Serge Mansur ta sinti cu ta bira hopi dificil pa un comerciante por planea p'e motibo ey. P'esey e ta sinti cu hopi inversionista di afo ta pensa dos biaha prome cu nan invirti akinan. E clima di inversion a sufrí grandemente durante e ultimo tempo na Aruba. Cambio den belasting y di otro asunto por, y hasta ta necesario, pero bo tin cu hacie den consulta y anuncie cu suficiente anticipacion, pa tur hende haya oportunidad pa planea y ahusta.

Den caso di BBO, Serge ta haya cu e idea di belasting directo pa indirecto ta bon. Tur hende ta di acuerdo cu esey, pero e parti cu mester a compensa y controla no tabat'ey. Ta mescos cu a agrega mas belasting. E manera cu a hacie a resulta den un forma mas di ranca placa di comunidad. Mi no ta kere cu loke un otro partido kier bin cune, esta di elimine sin mas, no ta e solucion, esey ta pa trek voto. Si por kit'e y percura pa beneficia e comunidad, ban hasie, pero e mester wordo hasi na un forma responsabel y den discusion cu tur esnan involvi. E ta mir'e como algo cu mester studia profundamente. Y si djis mira nos cifra di inflacion, Serge ta opina, bo ta mira cu no a planea e cos aki debidamente. E ta insisti cu mester papi cu e gremionan pa bo tin un base amplio pa decisionan grandi.

Serge ta sinti cu den turismo gobiernu ta traha contradictorio. Ta traha mas hotel y ta permiti construcion di condominio sin guia y na otro banda kier stroba e hendenan cu mester pa traha e hotelnan aki y alavez traha den nan. Si bo traha cu vision bo ta percura pa nos Arubianonan ta cla pa traha den e hotelnan y cu tin suficiente pa traha. Segun Serge e modelo Suizo manera e ta wordo implementa na Aruba no ta funciona pa e ramo hotelero. E ta mira espacio pa sigui diversifica turismo den mercadonan nobo y Brazil, Europa y busca e airlift necesario.

Mansur ta bisa cu e biahenan pa China y India di gobierno por ta bon idea pero nan ta mal realiza. Tur informacion di e biahenan aki ta secreto. Pakico ta hasi viahe pa stimula negochi sin comerciante? Ta e comerciante al final tin cu

bay risca su placa pa haci e negoshi.

Recientemente nan a trece na cono-cimiento, den nan conferencia di prensa, riba tereno di energia alternativo y con nan tin pensa di reduci e 'brandstoflaulsule', cu ta contribui na nos inflacion halto. Serge ta mira tambe hopi espacio pa cooperacion cu Hulanda, particularmente riba nivel di enseñanza.

E ta indica su intencion pa bay traha duro pa mehora hopi riba nos isla. Mi ta reconoce cu e arena politico no ta facil, y cu ta bai tin dianan dificil mi dilanti, pero manera Abe Lincoln a yega di bisa 'The good thing about the future is that it comes to you one day at a time'. Ta mi intencion pa yuda construi un mihor futuro pa nos pais. Naturalmente ta su apoyo lo determina su futuro politico. ■

